

Lajčák: Organi vlasti u BiH znaju šta moraju poduzeti da bi došlo do ukidanja viza

www.reci.ba

Organi vlasti u BiH vrlo dobro znaju koji su uslovi za ukidanje viza za građane koji putuju u zemlje Evropske unije, još jednom je istakao specijalni predstavnik EU Miroslav Lajčák.

«Razumijem teškoće s kojima se suočavaju građani BiH kada moraju podnijeti zahtjeve za vize, a od mene bi bilo neodgovorno da prognoziram kada bi tačno moglo doći do promjene postojećih uslova za dobijanje viza», rekao je specijalni predstavnik EU u svom odgovoru građanima na pitanje postavljeno putem web stranice www.reci.ba. «Međutim, želim još jednom naglasiti da ne postoji ništa nejasno u pogledu mjera koje nadležni organi vlasti trebaju smjesta poduzeti da bi se vizni režim promijenio.»

Specijalni predstavnik EU je konstatirao da su pregovori o liberalizaciji viznog režima u toku i da uslove koje je definirala Evropska komisija nije nemoguće ispuniti, jer ih već ispunjavaju sve zemlje u okruženju.

Lajčák je u svom odgovoru građanima izjavio da kašnjenjem u procesu primjene uslova koje je definirala EU bosanskohercegovačke institucije jednostavno šalju poruku da ih ukidanje viza ne zanima. To je u najmanju ruku neodgovoran odnos prema građanima i to se odmah mora promijeniti nabolje.

Odgovori specijalnog predstavnika EU su dio kontinuiranog dijaloga s građanima koji se odvija putem interaktivne web stranice www.reci.ba. Miroslav Lajčák je putem ove web stranice odgovorio na stotine pitanja i pozvao građane da izraze svoje nade i bojazni vezane za proces integracije BiH u Evropsku uniju.

Vizni režim se stalno pojavljuje kao jedno od pitanja koje najviše opterećuje građane BiH.

Specijalni predstavnik EU pozvao je građane koji žive u zemljama Evropske unije da odgovore na njegovo novo pitanje, daju svoje mišljenje i prezentiraju svoja iskustva, pozitivna i negativna te sugerišu načine na koje Bosna i Hercegovina može ostvariti brži napredak na putu ka punoj integraciji u EU.